

中国西南民族史 配布資料

12 大理国後期の国家体制と大理国の衰亡

12.1 『元史』卷六十一 志第十三 地理四

雲南諸路行中書省，爲路三十七、府二，屬府三，屬州五十四，屬縣四十七。其餘甸寨軍民等府不在此數。馬站七十四處，水站四處。

雲南諸路道肅政廉訪司。大德三年，罷雲南行御史臺，立肅政廉訪司。

中慶路，上。唐姚州。閻羅鳳叛，取姚州，其子鳳伽異增築城曰柘東，六世孫券豐祐改曰善闡，歷五代迄宋，羈縻而已。元世祖征大理，凡收府八，善闡其一也，郡四，部三十有七。其地東至普安路之橫山，西至緬地之江頭城，凡三千九百里而遠；南至臨安路之鹿滄江，北至羅羅斯之大渡河，凡四千里而近。……

12.2 『新唐書』卷二百二十二上 南蛮伝上

……大府主將曰演習，副曰演覽；中府主將曰繕裔，副曰繕覽；下府主將曰澹酋，副曰澹覽。小府主將曰幕撫，副曰幕覽。府有陀酋，若管記；有陀西，若判官。大抵如此。……

12.3 『続資治通鑑長編』卷十 開宝二年（969）六月（10.9と同じ）

邛部川蠻都鬼主阿伏與山後兩林蠻王子勿兒遣人以狀白黎州，期十月入貢，成都府奏其狀，詔許之。續錦里耆舊傳云：乾德三年夏，黎州遞到雲南牒，稱大理國建昌城演習爽賀平蜀之意。又開寶元年二月，黎州遞到南詔建昌城牒，云欲通好。厥後寂無文字，但遣近界邛部、兩林川王子、時有進奉。邛部、兩林川者，卽古之嵩、姚州也。邛部川去黎州大渡河界七程，兩林川十四程，建昌城二十四程，雲南數十程。

12.4 『元史』卷六十一 志第十三 地理四

建昌路，下。本古越嵩地，唐初設中都〔督〕府，治越嵩。至德中，沒于吐蕃。貞元中復之。懿宗時，蒙詔立城曰建昌府，以烏、白二蠻實之。其後諸酋爭強，不能相下，分地爲四，推段興爲長。其裔浸強，遂併諸酋，自爲府主，大理不能制。傳至阿宗，娶落蘭部建蒂女沙智。元憲宗朝，建蒂內附，以其婿阿宗守建昌。至元十二年，析其地置總管府五、州二十三，建昌其一路也，設羅羅宣慰司以總之。本路領縣一、州九。州領一縣。本路立軍民屯田。

……

隆州，下。州在路之西南，與漢邛〔部〕〔都〕縣接境，唐會川縣之西北。蒙氏改會川爲會同邏，立五臉，本州爲邊府臉。其後臉主楊大蘭於臉北塏上立城，分派而居，名曰大隆城，卽今州治也。元至元十三年內附。十四年，設千戶。十七年，改隆州。

……

會川路，下。路在建昌南。唐移邛都於此。其地當征蠻之要衝，諸酋聽會之所，故名。天寶末，沒於南詔，立會川都督府，又號清寧郡。至段氏仍爲會川府。元至元九年內附，十四年立會川路，治武安州。領州五。本路立軍民屯田。

永昌州，下。州在路北，治故歸依城，卽古會川也。唐天寶末，沒於南詔，置會川都督。至蒙氏改會同府，置五臉，徙張、王、李、趙、楊、周、高、段、何、蘇、龔、尹十二姓於此，以趙氏爲府主，居今州城。趙氏弱，王氏據之。及段氏〔興〕，高氏專政，逐王氏，以其子高政治會川。元憲宗三年，征大理，高氏逃去。九年，故酋王氏孫阿龍率衆內附。至元八年，以其男阿禾領會川。十四年，改管民千戶。十七年，立永昌州，隸會川路。

12.5 『元史』卷六十一 志第十三 地理四

鶴慶路軍民府，下。府治在麗江路東南，大理路東北，夷名其地曰鶴川、樣共。昔隸越析詔，漢、唐未建城邑。開元末，閣羅鳳合六詔爲一，稱南詔，徙治羊苴〔咩〕城，地近龍尾、鶴柘，今府卽其地也。大和中，蒙勸封祐於樣共立謀統郡。蒙氏後，經數姓如故。元憲宗三年內附，爲鶴州。七年，立二千戶，仍稱謀統，隸大理上萬戶。至元十一年，罷謀統千戶，復爲鶴川。二十年，爲燕王分地，隸行省。二十三年，升爲鶴慶府。領一縣：

劍川。下。縣治在劍川湖西，夷云羅魯城。按唐史南詔有六節度，劍川其一也。初蒙氏未合六詔時，有浪穹詔與南詔戰，不勝，遂保劍川，更稱〔浪劍〕〔劍浪〕。貞元中，南詔擊破之，奪劍、共諸川地，其酋徙居劍睽西北四百里，號劍羌。蒙氏終，至段氏，改劍川爲義督險。憲宗四年內附。七年，立義督千戶。至元十一年，罷千戶，立劍川縣，隸鶴州。軍民屯田共一千餘雙。

……

元江路……步日部。在本路之西。蒙氏立此甸，徙白蠻鎮之，名步日險。

……

柔遠路，在大理之西，永昌之南。其地曰潞江，曰普坪險，曰申臉焚寨，曰烏摩坪。僂蠻卽通典所謂黑爨也。中統初，僂酋阿八思入朝。至元十三年，與茫施、鎮康、鎮西、平緬、麓川俱立爲路，隸宣撫司。


12.6 『聖朝混一方輿勝覽』卷中 雲南等處行中書省

元江路

沿革 蠻名惠籠甸，又謂之因遠部，蒙氏立威遠險。至元間立總管府，領一十二部。

12.7 『寰宇通志』卷百十三 麗江軍民府 蘭州

在府城西三百六十里，漢爲永川郡博南縣地，唐爲南詔之地。本獠蠻所居，名羅眉川，後蒙閣羅鳳嘗徙善闡楊城堡張、楊、李、趙、何、周、任七姓戍守之。大理段氏置瀾滄郡，元隸茶罕管民官，後於羅眉川置蘭州，國朝因之。



大理国（後期）時代の地方統治機構（配布資料 の地図と比較せよ）

12.8 『大理行記』(元·郭松年撰)

中慶距大理，城西顧里有千。歷府治一，曰威楚；州四，曰安寧、鎮南、雲南、趙州；縣三，祿品、安邊、白崑，皆三府支屬。鎮南而西有雌嶺，即大理之境。

……

又北行十五里至大理，名陽苴咩城，亦名紫城，方圍四五里，即蒙氏第五主神武王閣羅鳳贊普鍾十三年甲辰歲所築，時唐代宗廣德二年也。自後鄭、趙、楊、段四氏皆都其中。是城也，西倚蒼山之險，東挾洱水之阨，龍首關於鄧川之南，龍尾關於趙險之北；昔人用心，自以為金城湯池，可以傳之萬世。及天兵北來，一鼓而下，良可嘆哉！此非在德不在險之明效大驗歟？

故大理之民，數百年之間五姓守固。值唐末五季衰亂之世，嘗與中國抗衡。宋興，北有大敵，不暇遠畧，相與使傳往來，通於中國。故其宮室、樓觀、言語、書數，以至冠婚喪祭之禮，干戈戰陳之法，雖不能盡善盡美，其規模、服色、動作、云為，畧本於漢。自今觀之，猶有故國之遺風焉。

……

然而此邦之人，西去天竺為近，其俗多尚浮屠法，家無貧富皆有佛堂，人不以老壯，手不釋數珠；一歲之間齋戒幾半，絕不茹葷、飲酒，至齋畢乃已。沿山寺宇極多，不可殫記。中峯之下有廟焉，是為點蒼山神，亦號中嶽。中峯之北有崇聖寺，中有三塔，一大二小，大者高二百餘尺，凡一十六級，樣製精巧，即唐遣大匠恭韜、徽義所造。塔成，韜、義乃歸。中峯之南有玉局寺，又西南有上山寺。凡諸寺宇皆有得道居之。得道者，非師僧之比也。師僧有妻子，然往往讀儒書，段氏而上有國家者設科選士，皆出此輩。今則不爾。其得道者，戒行精嚴，日中一食，所誦經律一如中國；所居洒掃清潔，雲煙靜境，花不禪房，水循堂厨，至其處者，使人名利之心俱盡。

此大理之大觀。南游則永昌、騰衝，北走則鶴慶、麗江。周行數千里，皆莫若此也。

12.9 『元史』卷三 本紀第三 憲宗

二年……秋七月，命忽必烈征大理，……

三年癸丑……九月，忽必烈次忒刺地，分兵三道以進。

冬十二月，大理平。

四年甲寅……冬……忽必烈還自大理，留兀良合台攻諸夷之未附者，入覲於獵所。

六年丙辰……是歲……雲南酋長摩合羅嵯及素丹諸國來覲。兀良合台討白蠻等，克之；遂自昔八兒地還至重慶府，敗宋將張都統。賜金縷織文衣一襲、銀五十兩、綵帛萬二百匹，以賚軍士。

12.10 『元史』卷四 本紀第四 世祖一

歲癸丑……秋八月，師次臨洮。遣玉律朮、王君候、王鑑諭大理，不果行。

九月壬寅，師次忒刺，分三道以進。大將兀良合帶率西道兵，由晏當路；諸王抄合、也只烈帥東道兵，由白蠻；帝由中道。乙巳，至滿陀城，留輜重。

冬十月丙午，過大渡河，又經行山谷二千餘里，至金沙江，乘革囊及楫以渡。摩娑蠻主迎降，其地在大理北四百餘里。

十一月辛卯，復遣玉律朮等使大理。丁酉，師至白蠻打郭寨，其主將出降，其姪堅壁拒守，攻拔殺之，不及其民。庚子，次三甸。辛丑，白蠻送款。

十二月丙辰，軍薄大理城。初，大理主段氏微弱，國事皆決於高祥、高和兄弟。是夜祥率眾遁去，命大將也古及拔突兒追之。帝既入大理，曰：「城破而我使不出，計必死矣。」己未，西道兵亦至，命姚樞等搜訪圖籍，乃得三使尸，既瘞，命樞為文祭之。辛酉，南出龍首城，次趙險。癸亥，獲高祥，斬于姚州。留大將兀良合帶戍守，以劉時中為宣撫使，與段氏同安輯大理，遂班師。

12.11 『元史』卷一百二十一 列傳第八 速不台〔兀良合台〕

憲宗即位之明年，世祖以皇弟總兵討西南夷烏蠻、白蠻、鬼蠻諸國，以兀良合台總督軍事。其鬼蠻，卽赤禿哥國也。癸丑秋，大軍自且當嶺入雲南境。摩些二部酋長唆火脫因、塔裏馬來迎降，遂至金沙江。兀良合台分兵入察罕章，蓋白蠻也，所在寨柵，以次攻下之。獨阿塔刺所居半空和寨，依山枕江，牢不可拔。使人覘之，言當先絕其汲道。兀良合台率精銳立砲攻之。阿塔刺遣人來拒，兀良合台遣其子阿朮迎擊之，寨兵退走。遂并其弟阿叔城俱拔之。進師取龍首關，翊世祖入大理國城。

甲寅秋，復分兵取附都善闡，轉攻合刺章水城，屠之。合刺章，蓋烏蠻也。前次羅部府，大酋高昇集諸部兵拒戰，大破之於洩可浪山下，遂進至烏蠻所都押赤城。城際滇池，三面皆水，既險且堅，選驍勇以砲摧其北門，縱火攻之，皆不克。乃大震鼓鉦，進而作，作而止，使不知所爲，如是者七日，伺其困乏，夜五鼓，遣其子阿朮潛師躍入，亂斫之，遂大潰。至昆澤，擒其國王段（智興）〔興智〕及其渠帥馬合刺昔以獻。餘衆依阻山谷者，分命裨將也里、脫伯、押眞掩其右，合台護尉掩其左，約三日捲而內向。及圍合，與阿朮引善射者二百騎，期以三日，四面進擊。兀良合台陷陣鏖戰，又攻纖寨，拔之。至乾德哥城，兀良合台病，委軍事於阿朮。環城立砲，以草填塹，衆軍始集，阿朮已率所部搏戰城上，城遂破。

12.12 『增訂南詔野史』卷上

興智 贈天定賢王

興智，南宋理宗辛亥淳佑十一年卽位。明年，改元利正。又改元興正、天定。是年，南宋理宗壬子淳佑十二年，爲蒙古憲宗之二年七月丙午，太弟忽必烈等奉憲宗命，伐大理。受制專征，以大將兀良合台總督軍務。八月，次臨洮，由六盤踰吐蕃，凡行山谷二千餘里無人之境。先遣王律朮、王侯、王鑑來諭大理，道阻而還。九月，次忒刺，分三道進。兀良合台率西道兵，由晏當路，諸王抄合也只烈率東道兵，由白蠻，忽必烈率勁騎，由中道。乙巳，至滿陀城，留其輜重。十月，過大渡河。十一月，至白蠻打郭砦。十二月，再遣三使入大理，招興智，皆被殺。智命相國高泰祥守金沙江，與蒙古將伯顏不花、虎兒敦等相持。忽必烈命衆以革囊潛濟江，破吐蕃，涉摩荻，出石門，所過降之，遂進薄大理。泰祥回軍，奉興智拒戰，不勝。蒙古兵入上關。智奔鄯闡，泰祥退至統失邏先爲姚安府，府裁，今爲姚州，屬楚雄府。募兵於三十七部未至，而蒙古兵已長（驅）〔驅〕而入，泰祥被執大理，不屈，乃斬於五華樓下。祥臨刑嘆曰：「段運不回，天使其然，爲臣殞首，蓋其分也。」時白日正午，忽雲起雷震，天鼓大鳴，忽必烈曰：「忠臣也。」泰祥夫人段氏，抱孤兒高瓊、高長壽等伸訴。忽必烈日兒顧左右曰：「此忠臣後，宜善視之。」許以世其官。高泰祥爲大中國昇泰九世孫。遂滅段氏而有其地，得五城、八府、蠻部三十有七。乘勝入吐蕃，降其酋。明年，南宋理宗癸丑寶祐元年，爲蒙古憲宗之三年，忽必烈班師。大將兀良合台拔鄯闡，獲興智以獻，憲宗命赦之，封爲摩訶羅嗟，管領八方，仍守其地，世襲總管。計興智在位二年，憲宗授兀良合台銀印，加大元帥，還鎮大理。以劉時中爲宣撫使，與興智同安輯焉。南宋理宗庚申景定元年，爲蒙古世祖忽必烈之中統元年，興智率其季弟段信苴福北行，朝於世祖，道卒。計爲總管又七年。蒙古遣使來祭弔，文曰：「段氏承八姓正位，歸有新統，既順天時以向義，猶得國王以棲遲，實國家待遠方之仁，由賢王能左右之義。受命以來，朝夕惕勵。賴爾維勤，用征不廷，正當共享亨嘉之運，胡意遽罹霜露之災，嗚呼！當朕未集大統，乃爲叔季之國。茲既承景運，合正君臣之稱，參錄不替於子孫，詔祿宜昭於典冊，特遣太常省祭，贈爲後理國向義天定賢王段公，尙賴神麻，永保祚土。所贈王爵，後不爲例。」明年，南宋理宗辛酉景定二年。爲蒙古世祖中統二年，世祖勅授王之弟信苴日則段實。總管守大理。命之曰：「向率我以臨爾境衆據國人之請，因從城下之盟，款附而忠勤益著。庸示至優之禮，以彰同視之仁。可革帝號，錫以虎符，總理大理、鄯闡、威楚、統矢、會川、建昌、騰越諸郡，撫卹已附之民，招集未降之國，卿其勉之。」

按：段氏後理國，自段正淳復國，起宋哲宗丙子紹聖三年，訖南宋理宗癸丑（實）〔寶〕應元年，傳八世，共一百五十七年。

總計段氏大理、後理二國，傳二十二世，共三百零十五年。